

Fuzeenn Falcon 9



Ar wech-mañ ez eo gant ar fuzeenn savet gant ar stal Space X eo aet an astraerien di. Ur fuzeenn brevez an hini eo. An estaj kentañ (1) hag al lestr *Crew Dragon* (2) a c'hall bezañ implijet meur a wech.



# Bevomp e bourzh an ISS gant Thomas Pesquet


Thomas Pesquet zo un astraer gall 43 bloaz. E eil beaj en egor an hini eo. E-pad 196 devezh e oa bet en ISS etre miz Du 2016 ha miz Even 2017. Evel ma lavare a-raok loc'hañ kuit e oar penaos e tro an traoù e-pad ur veaj a seurt-se ha petra zo aes pe diaes da vevañ.



Thomas Pesquet a dremano 6 miz e bourzh an ISS. C'hwec'h astraer all zo gantañ. Amañ ar skipailh a oa gantañ e 2016-2017. Poent debrïñ!



Pevar flas zo e bourzh al lestr *Crew Dragon*. Gant Thomas Pesquet edo Megan McArthur, Shane Kimbrough hag Akihiko Hoshide.



N'eus ket pounnerder e bourzh an ISS, abalamour da se e nij an dud hag an traoù. Diwar-se e koll an astraerien o c'higennoù hag e rankont ober sport ingal evit chom yac'h.



D'ar Gwener 23 a viz Ebrel 2021 e oa loc'het kuit ar fuzeenn *Falcon 9* eus Cape Canaveral er Stadoù-Unanet.



Enklaskoù a bep seurt o devez an astraerien da gas da benn. Pouezus-kenañ eo gouzout penaos ez a en-dro korf an den en egor evit gallout soñjal mont pelloc'h war-zu al Loar pe Meurzh.



Sed amañ al lestr *Crew Dragon* o tostaat ouzh an ISS goude 23 eurvezh beaj.

Lodenn gentañ an International Space Station (ISS) pe Savlec'h Egor Etrebroadel (SEE) a oa bet lañset e 1998. Goude-se e oa bet staget meur a damm all outi. 420 tonenn a bouez zo ennañ ha 100 metr hirder dezhañ. E-tro 400 km a-zioc'h hor penn emañ. Lakaat a ra war-dro 93 munutenn d'ober tro an Douar. 250 astraer o deus labourret ennañ abaoe 2000.

## Greomp tro an « ti »

- A** Lec'h bevañ ennañ ur gegin, gweleoù pleg-dibleg, peadra d'ober sport, levrioù, c'hoarioù.
- B** Meur a labourva zo evit kas enklaskoù da benn.
- K** Ur vrec'h vras zo evit pakañ krog el listri egor pe evit kas labourioù da benn e diavaez ar savlec'h.
- D** Panneloù-heol : hepto ne vefe ket a dredan e bourzh.



Peder gwech en do Thomas Pesquet da vont er-maez evit labourat. Panneloù-heol nevez en do da staliañ.